

Unha nova andaina da Saúde Pública en Galicia

Miguel Ángel Rodríguez Muíños, Xurxo Hervada Vidal, Manuel Varela Rey

Dirección Xeral de Innovación e Xestión da Saúde Pública. Consellería de Sanidade. Xunta de Galicia.

Cad Aten Primaria
Ano 2010
Volume 17
Páx. 239-239

O Consello da Xunta aprobou, o 11 de novembro, un decreto que fixa a estrutura orgánica dalgúns departamentos da Xunta de Galicia. Por mor deses cambios a Dirección Xeral de Saúde Pública e Planificación da Consellería de Sanidade pasa a chamarse Dirección Xeral de Innovación e Xestión da Saúde Pública.

Como se comenta na memoria acompañante o propio decreto, e asemade do nome, o cambio afectará ao xeito de conquistar os obxectivos, reorientándose as súas actuacións cara á xestión por procesos, á busca de sinerxías cos axentes sociais e ao posicionamento de cara á nova Estratexia europea 2020. Neste sentido, a Estratexia europea 2020 céntrase nas accións colectivas e na obtención de resultados tanxibles en termos de altos niveis de emprego, produtividade e cohesión social. Polo tanto, as iniciativas que promove están centradas na innovación, na axenda dixital europea e na xuventude como motor do cambio, así como na loita contra as desigualdades. No eido das organizacións sanitarias, cómpre que estas incorporen novas tecnoloxías da información e comunicación nas cartas de servizos á poboación, de xeito que se superen as barreiras xeográficas, funcionais ou xeracionais a través de fórmulas en liña, plataformas de comunicación ou redes sociais. Doutra banda, considérase necesario maximizar os beneficios da innovación en saúde para a poboación, contribuíndo á incorporación de procedementos e tecnoloxías no contorno sanitario que contribúan a un ambiente máis sustentable e respectuoso coa saúde dos cidadáns. Tamén é preciso poñer en marcha novas iniciativas que activen as entidades locais e asociacións cidadás para que estas participen activamente na xestión da súa propia saúde. Con este obxectivo, é necesario reorientar os procesos, desenvolver novos modelos e estratexias da xestión en materia de saúde pública, e empezar por un posicionamento novo de cara ao futuro inmediato, no marco do contexto europeo, para aproveitar ao máximo as novas oportunidades.

Para responder a estes novos retos, a actual Dirección Xeral está a levar a cabo este proceso de reorientación das súas funcións sen cambiar o fondo e os fins das mesmas.

Por iso, cómpre dotala dunha nova denominación que reflecta mellor esta transformación na cultura da organización. As súas funcións serán as mesmas que ata agora, polo que o cambio só afectará o xeito de conquistar os seus obxectivos. A súa misión segue a ser a de fomentar, protexer e contribuír a mellorar a saúde da poboación galega, a través da planificación das diferentes actuacións que contribúan a mellorar a saúde, a asegurar o libre exercicio dos dereitos e deberes sanitarios dos cidadáns, e a garantir a toda a poboación galega unhas mesmas prestacións e garantías sanitarias. E tamén, a través do desenvolvemento de actuacións comunitarias para o control dos riscos de enfermarse asociados a determinantes de saúde.

A visión desta Dirección Xeral é a de alcanzar un nivel de planificación e coordinación que permita asegurar os dereitos dos cidadáns e desenrolar servizos para mellorar a súa saúde de forma eficiente, contribuíndo así a asegurar a sustentabilidade do sistema. E, ademais, ser o punto de referencia na toma de decisións que incidan na saúde comunitaria, sendo unha garantía de seguridade para a cidadanía.

As súas premisas seguen a ser a equidade na xestión dos intereses colectivos, a eficiencia na utilización dos recursos, o traballo orientado a resultados para a comunidade, o traballo en equipo, en coordinación con toda a Consellería e SERGAS, a mellora continua da calidade, o traballo acorde co coñecemento dispoñible nese momento, a orientación ó desenvolvemento e implicación dos profesionais e a orientación a xestión por procesos e feitos.